

MALAYSIA BERSAMAMU

KUALA LUMPUR 2017
SUKAN SEA KE-29
SUKAN PARA ASEAN KE-9



Hua Wei (kiri) dan Zylane bakal jadi sandaran pingat emas negara di Pusat Akuatik Negara Bukit Jalil, hari ini.

Malaysia, Singapura berentap

➔ Lima emas jadi rebutan dalam acara renang berirama

Oleh Ajitpal Singh
ajitpalsingh@nst.com.my

▀ Kuala Lumpur

Skuad negara dijangka bersaing sengit dengan Singapura untuk merebut lima pingat emas yang ditawarkan dalam acara renang berirama dengan rutin solo teknikal dan rutin solo bebas akan membuka tirainya di Pusat Akuatik Negara Bukit Jalil, hari ini.

Skuad negara menyapu bersih kelima-lima emas pada temasya 2011 di Indonesia menerusi Katrina Ann Hadi dan juga Phg Hui Chuen.

Namun, persaraan beberapa atlet negara membolehkan Singapura muncul juara pada temasya 2015 yang berlangsung di laman sendiri apabila meraih dua

daripada tiga emas yang ditawarkan.

Singapura memiliki kelebihan psikologi ke atas Malaysia memandangkan ranking mereka lebih tinggi bagi kategori rutin solo teknikal, rutin solo bebas, rutin duet teknikal dan rutin duet bebas pada Kejohanan Dunia di Budapest, bulan lalu.

Emas tunggal

Prestasi kurang memberangsangkan pada temasya itu memaksa jurulatih, Long Yan mengambil keputusan menukar rutin perenangannya yang menyaksikan gandingan Zylane Lee Yhing Huey-Gan Hua Wei diletakkan antara sandaran emas.

Zylane, 25, adalah atlet paling berpengalaman daripada skuad temasya 2015 dan gandingannya

bersama Katrina menghadiahkan emas tunggal bagi rutin duet teknikal yang digabungkan dengan rutin bebas dua tahun lalu.

“Saya melihat kelemahan daripada Kejohanan Dunia dan saya berpendapat perenang saya memerlukan rutin baharu. Saya yakin kita mampu memberi cabaran kepada Singapura.”

“Saya mengharapkan kita mampu memenangi dua daripada lima acara yang disertai. Sukar untuk kita memberi saingan kepada Singapura dalam acara rutin bebas berpasukan memandangkan selain Zylane, sebahagian besar atlet kita masih baharu,” kata Long Yan.

Peluang terbaik Malaysia meraih emas dalam acara rutin duet teknikal, esok dengan harapan disandarkan pada gandingan Zylane-Hua Wei.

